

I CARNALI E I 'NNIMALI

Ci dissi nu jadduzzu 'a na jaddina
"sì na' pitulanti e na' culumbrina,
pi' nu semplici ova chi facisti
carcariannu comu nu timpurali
'rribbillasti cani, jatti, surici e maiali".
"Ma vadda 'nticchjia, Santantoni miu",
rispunnivu 'a jaddina tutta cuntrariata,
"parrau nu jaddazzu tantu buriusu
chi quannu si metti 'a cantari,
cu' 'ffari 'mpiriusu e spacchiusu,
rintrona staddi, canili e casulari.
Ti meriti d'essiri 'nfilatu ntà nu spitu,
'rrutulatu ntò menzu 'a braci
e manciatu a' muzzicati vuraci".
"Lèviti davanti prima mi ti spinnu"
riplicavu u' jaddu jisannu 'a cricchjia
"ti fazzu vèdiri jò cu sugnu, brutta racchjia",
'ssicutannula pi' tutta 'a jaggjia.
Sintennu tuttu stu 'ran baccanu
niscivu 'a patruna tutta 'nfuriata,
'ffirravu na scupa e dannu mazziati,
ridducivu senza pinni i du' disgraziati.
"E' tantu vèdiri sciarriarisi i carnali,
ma no pozzu capiri sti cosi tra 'nnimali".